

# Resume de les actividaes de l'Asamblea de Docentes de Llingua Asturiana del 31 de xineru de 2013

Esti xueves 31 de xineru féxose n'Uviéu ún de los actos alcordaos na anterior asamblea del día 15, la entrega de cartes de los escolinos de Llingua Asturiana y Gallego-Asturiano nel Rexistru de la Conseyería d'Educación. L'actu cuntó cola presencia d'unos sesenta docentes que, en representación de 44 centros de Primaria y Secundaria, presentaron más de 2.100 cartes de nenos y nenes que desplicaben por qué yera importante pa ellos seguir recibiendo clase de Llingua Asturiana.

N'acabando l'actu celebróse una asamblea nel IES Aramo d'Uviéu, onde s'informó de lo siguiente:

-Valoróse mui positivamente la respuesta del profesoráu y los estudiantes a l'actividá de les cartes, aunque supimos qu'en dellos casos esta actividá nun pudo facese poles torques que punxeron dende la direcció de los centros.

-Informóse tamién del estáu de la pitición on line "Nun permitas que l'asturianu desapaeza del sistema educativu" al traviés de la páxina change.org. El mesmu día 31 algamáronse les 2.500 firmes en namás dos selmanes, cosa que tamién se vio como enforma positiva.

-Féxose tamién el siguimientu de les mociones presentaes en claustros y consejos escolares. De momentu sabemos polo menos de diez centros que yá les aprobaron. Falóse de la importancia de que SUATEA tenga la comunicació de qu'eses mociones van aprobándose, pa centralizar la información y poder facela pública cuando'l númeru de centros seya bien curiosu.

-Tratóse'l tema de la enmienda presentada nel Conseyu Escolar del Estáu dende la Conseyería asturiana, que foi valorada como una auténtica chapuza, tanto na forma como nel conteníu, yá que nun garantiza pa nada la continuidá de l'asignatura. Valoróse tamién qu'esti tema valió per parte de la Conseyería pa llanzar una cortina de fumu que valió pa desmovilizar a parte del profesoráu que pensó, en viendo les noticies en prensa, que "yá taba too iguao" cuando la rialidá ye exactamente la contraria. Nesi sen, vióse la necesidá de redoblar esfuercios pa desplicar, tanto al conxuntu del profesoráu como a tola comunidá educativa, que la situación ye pergrave.

-Criticóse enforma l'oscurantismu de la Conseyera, a quince díis de la pitición d'una entrevista per parte de l'asamblea, tovía nun se dignó a contestar nin a dar desplicación dala de cómo ta'l presuntu procesu negociador en Madrid.

-Comunicóse a l'asamblea que, tando pendiente de confirmación, va haber una reunión d'una delegación de l'asamblea col grupu parlamentariu d'IU, dentro de la llinia d'entrevistase con tolos grupos presentes na Xunta Xeneral.

De secute, l'asamblea pasó a valorar los siguientes pasos a dar. Salieron estos:

-Participar en toles movilizaciones sociales que se presenten nes próximes selmanes escontra los retayos y la política d'"austeridá" con un cortexu propiu que visibilice'l conflictu llingüísticu. Llevaríase una pancarta col slogan "Llingua nes escoles como les demás" pa la manifestación escontra la LOMCE prevista pal

xueves 7 de febreru a les 16:00 hores n'Uviéu y pa la que va haber de tolos sectores en llucha pal sábadu día 23.

-Entamar una concentración pal xueves 21 de febreru na Plaza La Escandalera d'Uviéu con motivu del Día Internacional de la Llingua Materna, col envís de da-y una visibilidá individualizada a la nuestra reivindicación.

-Facer públiques toles reuniones que tengamos con grupos políticos y d'otru calter, como forma tamién de retratar a los que se nieguen a aconceyar con nós.

-Intentar implicar nesta llucha non solo al profesoráu d'asturianu, sinón al conxuntu del profesoráu, a los estudiantes y a les madres y padres.

-Treslladar al conxuntu de la sociedá qu'esta llucha nun ye solo la de los docentes d'asturianu, sinón tamién la d'aquellos nenos y nenes que tienen l'asturianu como llingua materna y que, de despaecer l'asignatura, toparínse nuna situación enforma revesosa a nivel escolar.

-Desixir la presencia de l'asignatura na Educación Infantil.

-Desixir que la Llingua Asturiana seya una de les materies d'exame na PAU.

-Desixir el reconocimientu de l'asignatura insertándola nel catálogu de la Consejería, y cumpliendo l'alcuerdu de cuantayá de la Xunta Xeneral de criación de la especialidá.

Cola sensación de que tamos faciendo bien les coses, pero qu'hai xera abonda per delante, acabamos la sesión a les 20:00 hores.